

प्रादेशिक समाचार एकांश
आकाशवाणी रायपुर (छत्तीसगढ़)
प्रादेशिक समाचार बुलेटिन
(छत्तीसगढ़ी)

18.10 रविवार

दिनांक 06.07.2025

*****प्रमुख समाचार —

1—प्रदेस के कतकोन जघा म होवत हे सरलग बरसा — ए पाय के नरवा—नदिया उफनाय के संगे जनजीवन घलो हगे हे अस्त—व्यस्त।

2—नामी चिंतक अउ शिक्षाविद् डॉक्टर श्यामा प्रसाद मुखर्जी के जयंती के मउका म प्रधानमंत्री नरेंद्र मोदी अउ मुख्यमंत्री विष्णुदेव साय ह उनला सुरता करत दीन श्रध्दांजलि।

3—आज देसभर समेत छत्तीसगढ़ म श्रध्दा के संग मनाय जात हे मोहर्रम— ए मउका म निकाले जात हे ताजिया।

अब समाचार विस्तार ले

श्यामा प्रसाद मुखर्जी—जयंती

नामी चिंतक अउ शिक्षाविद् डॉक्टर श्यामा प्रसाद मुखर्जी के आज जयंती हरय। प्रधानमंत्री नरेंद्र मोदी ह सोसल मीडिया पोस्ट म किहीन कि डॉक्टर मुखर्जी के आदर्स अउ सिध्दांत ह विकसित अउ आत्मनिर्भर भारत बनया खातिर बड़ कीमती हे।

उहें, छत्तीसगढ़ के मुख्यमंत्री विष्णुदेव साय ह घलो आज रईपुर स्थित अपन निवास कार्यालय म डॉक्टर मुखर्जी के फोटो उपर हारफूल चढ़ाके उनला अपन श्रध्दांजलि दीन हे। मुख्यमंत्री श्री साय ह किहीन हे कि डॉक्टर मुखर्जी के जीवन ह राष्ट्रभक्ति, निःस्वार्थ सेवा अउ अखंड भारत के प्रति अटूट संकल्प के चिन्हारी हे।

अइसने, छत्तीसगढ़ विधानसभा परिसर स्थित सेंट्रल हाल म डॉक्टर श्यामा प्रसाद मुखर्जी के फोटू उपर राज्य विधानसभा सचिव दिनेश शर्मा ह पुष्पांजलि अर्पित करीन। विधानसभा परिसर स्थित प्रेक्षागृह के मुख्य द्वार म स्थापित डॉक्टर मुखर्जी के मूर्ति उपर विधानसभा सचिवालय के बड़का अधिकारी मन फूलमाला चढ़ाके उनला सुरता करीन।

बारिश

प्रदेसभर म मानसून पूरा तरह ले सक्रिय हे। एखर असर ले राज्य के कतकोन जघा म सरलग बरसा होवत हे, ए पाय के नरवा—नदिया उफनावत हे अउ जनजीवन घलो अस्त—व्यस्त हो गेहे। राजधानी रईपुर तीर—तखार के जघा कालीच ले रही—रही के पानी गिरत हे।

ओति, बलरामपुर जिला के राजपुर क्षेत्र घलो काली रतिहा ले सरलग बरसा के सेति ओकरा गेउर नदिया उफनावत हे। जिला म गागर, गोपालपुर अउ बासेन नदिया के संगेसंग छोट—बड़े पुलिया अउ नरवा मन घलो भरगे हवय।

इही बीच, राजपुर—अंबिकापुर रद्दा म आज बिहनिया एक ठिन गाड़ी ह अंतंतंते होके गागर नदी म गिरगे। फेर ड्राइवर अउ आने मनखे मन ल नदिया ले सुरक्षित बाहिर निकाल ले गीस।

उहें, कोरबा जिला म बीते चार दिन ले सरलग होवत रजरजहा बरसा ले न केवल रद्दाबाठ भलूक घर—द्वार दुकान मन म घलो पानी अमागेहे। पुल—पुलिया बोहाय ले कई ठिन गांव के संपर्क मुख्य सड़क ले टूट गेहे। कुसमुंडा के लक्ष्मण नाला म पानी ह पुलिया ले चार फीट उपर बोहावत हे। तेज पानी के बहाव ले कुचेना पुल

ह घलो टूट गेहे। खबर मिले हे कि तीर-तखार के इलाका म पानी भरे के सेति बड़ झिन मनखे घरे भीतरी फंदाय हे।

अइसनहे, कोरिया अउ बस्तर जिला के बड़ अकन जघा म बीते चौबीस घंटा ले झमाझम बरसा होय के समाचार हे।

इही बीच, मौसम विभाग ह चेताय हे कि अवइया दू दिन के दउरान प्रदेस के कई ठिन जघा म जोरदरहा बरसा हो सकत हे। संगे प्रदेस म कहू-कहू तेज हवा चले के संगे गाज घलो गिर सकत हे।

मुख्यमंत्री समीक्षा बैठक

मुख्यमंत्री विष्णुदेव साय ह किहीन हे कि नवा रईपुर के सुध्धर विकास ह सरकार के पहिली प्राथमिकता हे। नवा रईपुर जघा म अवइया बेरा के जरूरत ल धियान म राखत सुध्धर विकास करे जाही। श्री साय ह ए गोठ ल मंत्रालय म आवास अउ पर्यावरण विभाग के समीक्षा बइठका म किहीन। ओमन नवा रईपुर विकास प्राधिकरण के तहत चलइया कामकाज के जानकारी लेवत अधिकारी मन ल जरूरी दिसा-निरदेस घलो दीन।

मुख्यमंत्री ह परमालकसा-खरसिया के बीच प्रस्तावित नवा रेल लाइन ल नवा रईपुर ले जोड़े के मंसा जाहिर करीन। श्री साय ह भारतमाला प्रोजेक्ट के तहत विशाखापट्टनम ल जोड़इया एक्सप्रेस-वे ले आयात अउ निर्यात याने जिनिस ल बाहिर भेजई अउ बाहिर ले इंहा लवई एला प्रोत्साहित करे बर नवा रईपुर म लॉजिस्टिक हब बनाय के जरूरत बतइन। बइठका म अधिकारी मन ह बतइन कि छत्तीसगढ़ ले क्रास होके जवइया एक्सप्रेस-वे के निर्माण काम ह करीबन पंचानवे फीसदी पूरा हो गेहे। एखर बने ले रईपुर ले विशाखापट्टनम के दूरी सौ किलोमीटर कमती हो जही। मुख्यमंत्री ह यहू किहीन कि प्रदेस के नवा औद्योगिक नीति ले बड़ भारी अकन निवेसक मन रिझत हे, जेखर ले इंहा के जवान लइका मन ल कामकाज मिलही।

बइठका म वित्त मंत्री ओपी चौधरी अउ मुख्य सचिव अमिताभ जैन समेत आने बड़का अधिकारी मौजूद रिहीन।

उच्च न्यायालय डीजीपी नोटिश

छत्तीसगढ़ उच्च न्यायालय ह सहायक उपनिरीक्षक वाहन चालक के पद बर जारी प्रमोशन आर्डर के लागू करे उपर रोक लगावत पुलिस महानिदेशक अउ अतिरिक्त पुलिस महानिदेशक छत्तीसगढ़ सशस्त्र बल ले ए बारे म जवाब मांगे हे। रईपुर निवासी अउ बटालियन परसदा महासमुंद म पदस्थ प्रधान आरक्षक महेन्द्र सिंह कोरम के याचिका उपर न्यायाधीश रमेन्द्र कुमार अग्रवाल के बेंच म सुनवाई होइस।

मुंगेली-वृक्षारोपण

एक पेड़ मां के नाम अभियान के चलत मुंगेली जिला के गांव लोहड़िया अउ रामपुर म प्रधानमंत्री आवास योजना के पचास हजार हितग्राही मनके निवास जघा म एक लाख ले जादा नान्हे पउधा रोपे गीस। हर अंगना म हरियाली बढ़ाय के ए पहल ल गोल्डन बुक ऑफ वर्ल्ड रिकॉर्ड दर्ज करे गीस। ए अभियान के जिला स्तरीय कारीकरम लोहड़िया अउ रामपुर स्थित महात्मा गांधी ऑक्सीजन कैम्पस म राखे गे रिहीस, जेमा माई पहूना छत्तीसगढ़ के उपमुख्यमंत्री अरूण साव रिहीन।

ठगी-आरोपी गिरफ्तार

दुरुग पुलिस ह काल सेंटर खोलके ठगी करइया एक झिन बड़का गिरोह के पर्दाफास करे हे। ए मामला म दू झिन माईलोगिन समेत नौ झिन आरोपी ल गिरफ्तार कर ले गेहे। पुलिस ल सूचन मिले रिहीस कि भिलाई के चौहान टाउन म गैर कानूनी ढंग ले ऑनलाइन तरीका ले यूएसए अउ कनाडा के मनखे मन ले ठगी करे जात रिहीस।

जांजगीर-चांपा जिला के चांपा स्थित सार्वजनिक वितरण प्रणाली वाले रासन दुकान म करीबन सत्रह लाख रुपिया के गड़बड़ी के मामला म दुकान संचालक ल पुलिस ह गिरफ्तार करे हे।

उहें, इही जिला के शिवरीनारायण पुलिस ह म्यूल एकाउंट के मामला म तीन झिन आरोपी ल गिरफ्तार करे गेहे।

मोहर्रम

आज देसभर म मोहर्रम ल श्रध्दा अउ आस्था के संग मनाय जात हे। करबला म सत्य अउ न्याय के रक्षा बर पैगम्बर मोहम्मद के नाती हजरत इमाम हुसैन अउ उंखर साथी मनके शहादत के सुरता म मोहर्रम मनाय जाथे। ए मउका म ताजिया निकाले जाथे अउ करबला के शहीद मनके सर्वोच्च बलिदान के सुरता म मजलिस राखे जाथे।

ऐति, छत्तीसगढ़ म घलो मोहर्रम के मउका म राजधानी रईपुर समेत कई ठिन सहर मन म ताजिया निकाले जात हे। रईपुर के करबला म घलो हजरत हुसैन के बड़का कुर्बानी ल सुरता करत आज रतिहा मजलिस याने धार्मिक बइठका राखे जाही।

दुर्घटना

कोरबा जिला के कटघोरा-अंबिकापुर नेशनल हाइवे म एक ठिन तेज रफ्तार चारपहिया गाड़ी ल फटफटी संवार मनखे मन ल टक्कर मार दीस। ए हादसा म दू झिन मनखे मउत होगे। उहें, एक झिन आने जवान लइका के हालत गंभीर हे, फेर आरोपी ड्राइवर ल गिरफ्तार कर ले गेहे।

उहें, इही जिला के दीपका क्षेत्र म रैनपुर तीर आज बिहनिया यात्री बस अउ फटफटी के एक्सीडेंट होगे, जेमा फटफटी सवार जवान लइका के मउत होगे। उहें, एक झिन आने जवान लइका घायल होगे।

सहकारिता दिवस-संगोष्ठी

सहकारिता दिवस के मउका म नवा रईपुर स्थित राज्य सहकारी बैंक परिसर म एक दिन के संगोष्ठी राखे गे रिहीस। ए संगोष्ठी म सहकारिता मंत्री केदार कश्यप सामिल होइन अउ ओमन 'एक पेड़ मां के नाम' अभियान के चलत पउधा लगाइन। एखर बाद श्री कश्यप ह मवेसी अउ मछरी पलइया किसान मन ल रूपे केसीसी कार्ड के संगे दुग्ध सहकारी समिति मन ल माइक्रो एटीएम बांटिन। ए संगोष्ठी म बोलत श्री कश्यप ह किहीन कि 'एक पेड़ मां के नाम' ए अभियान ह सहकारिता के संग भारत म सामाजिक अउ पर्यावरण जागरूकता बर बड़का पहल हे।

